

HANCA Convention - Rooj sau siab 2007 nyob Twincities, Minnesota.

Ob lub xyoo twg ib zaug, HANCA muaj ib lub rooj sau siab rau tas nrho cov ntseeg thiab coj thawj coj hauv txoj kev ntseeg Catholic xws li cov Xib Hwb, cov Tsob Hwb thiab cov thawj coj ntawm tej pab pawg ntseeg nyob rau teb chaw "as mes lis kas".

Nyob rau xyoo 2005, lub rooj sau siab los yog HANCA Convention kuj tau muaj nyob rau Fresno, California. Xyoo 2007 no, lub rooj sau siab muaj nyob rau lub 6 hli ntuj tim 27 txog rau lub 7 hli tim 1 xyoo 2007.

Ib tsoom ntseeg Hmoob Catholic nyob rau txhua lub lav los yog State kuj kub siab lug, tuaj koom lub rooj sau siab nyob rau Minnesota tau 5 hnuv. HANCA tau thov ntau tus thawj coj tseem ceeb hauv txoj kev ntseeg tuaj mus muab lib qhuab qhia thiab ua pov thawj rau sawv daws. Cov thawj coj tuaj pab lub rooj sau siab muaj raws li cov npe nram no:

1. Txiv Plig Txhiaj Foom, tuaj Philipines teb tuaj
2. Txiv Plig Tshaj Xwm, tuaj Thaib teb tuaj
3. Txiv Plig Joseph Johnson, tuaj hauv lub Arch Diocese St. Paul thiab Minneapolis tuaj
4. Txiv Plig Andrew Cozzens, tuaj hauv lub Arch Diocese St. Paul thiab Minneapolis tuaj
5. Txiv Plig John Paul Erickson, tuaj hauv lub Arch Diocese St. Paul thiab Minneapolis tuaj
6. Txiv Plig Paul Fliss, tuaj hauv lub Diocese of Milwaukee Wisconsin tuaj
7. Mary Bossher, nyob Minnesota
8. Leej Phauj Mother General Maria Moryl, Sisters of St. Peter Claver, nyob Rome, Italy
9. Leej Phauj sister Sharon, nyob Minnesota
10. Alyssa Bormes, nyob Minnesota

Lub rooj sau siab muaj ob ntus: Ntu 1 (Hnuv Wednesday txog Thursday) yog lub rooj sau siab rau cov thawj coj ntawm tej pab pawg ntseeg Catholic.

- Tsob Hwb Vam Thaiv Lauj
Tsob Hwb Vam Thaiv hais me ntsis txog Ntuj lub txiaj ntsim. Nws hais tias txhua yam kev zoo thiab muab los hwm Ntuj mas yog Ntuj lub txiaj ntsim pub rau yus. Xws li tej kab kev Hmoob, tej yam zoo yog Ntuj tej txiaj ntsim. Thiab nws hais tias txhua yam kev "teev dab" uas tsis yog yam zoo, mas yuav tsum muab tso pov tseg, tab sis yuav tau khaws txhua yam lub moo zoo Catholic qhia rau sawv daws coj los hawm Ntuj.
- Xib Hwb Soob Naij
Xib Hwb Soob Naij hais txog txoj kev ua Yes Xus thwj tim. Nws hais tias kev ua Yes Xus thwj tim mas yus yuav tau siv kom tag nrho yus lub peev xwm, xws li tej dag zog, nyiaj txiag, lub siab lub ntsws, lub tswv yim, coj los ua Ntuj tes hauj lwm. Yog hais tias yus lam ua raws lub sij hawm yus nyiam xwb ces txhob ua. Yog tau ua lawm ces yuav ua kom kawg siab thiab raws li lub koom txoos vam thiab tos ntawm yus.
- Mary Bossher
Mary ua hauj lwm pab qhia tsoom ntseeg Catholic txog lub Koom Txoos Catholic. Nws kuj tuaj qhia tau ntau yam zoo hais txog lub Koom Txoos kev coj thiab khiav hauj lwm. Tej yam Mary qhia txog, yog tej yam uas cov ntseeg Catholic Hmoob tseem yuav tau kawm ntxiv kom paub ntau tshaj lawm yav tom ntej hais txog lub Koom Txoos
- Sr. Sharon
Leej Phauj Sharon hais txog kab lig kev cai thiab kev ntseeg Ntuj. Lub ntsiab ntawm nws cov lub qhuab qhia, nws hais tias: kev ua hauj lwm pab txoj kev ntseeg yog txhawb lub ntsiab qhov tseem ceeb hauv txoj kev ntseeg, tsis txhob sis tw nrog qhov tseem ceeb hauv txoj kev ntseeg.

- Alyssa Bormes
Alyssa hais txog kev coob qhia thiab kev sib koj nyob hauv yus tsev neeg ntseeg Catholic. Cob me tub me nyuam txog kev teev hwm Ntuj thiab qhia me nyuam txog cov cim ntshiab nyob hauv lub koom txoos Catholic yog qhov tseem ceeb tshaj rau cov ua niam ua txiv nyog rau hauv ib yim neeg Catholic.
- Sister Maria Moryl
Leej Phauj Maria Moryl tau tuaj qhia txog txoj kev ua pov thawj hauv txoj kev ntseeg thiab kev txiav txim siab los koj ib lub neej nyob tab seeb, ua thiab txhawb Tswv Ntuj tes hauj lwm.

Ntu 2 (Hnub Friday txog Saturday) yog lub rooj sau siab rau cov thawj koj thiab tag nrho ib tsoom ntseeg Hmoob Catholic.

[Saib duab \(pictures\)](#)

- Txiv Plig Joseph Johnson - Ntuj hu peb txhua tus los ua leej ntshiab
Txiv Plig Joseph Johnson yog tus Txiv Plig tuav npawg ntseeg Hmoog Catholic nyob rau St. Paul thiab Minneapolis. Txiv Plig Johnson hais tias peb ua neeg ntseeg mas yog peb nrhiav txoj kev thaj yeeb nyab xeeb hauv peb. Cuab yeej cuab tam thiab kev nplua nuj tsis ua kom peb muaj kev thaj yeeb thiab zoo siab mus li. Peb yog neeg ntseeg, peb yuav tau xyaum koj lub neej kom phim peb txoj kev ntseeg thiab xyaum koj ib lub neej ntshiab xws li koj Leej Ntshiab ua thaum lawv tseem ua neej nyob.
- Txiv Plig Txhiaj Foom - Cov Ntseeg Catholic thiab lwm pab lwm pawg sib txawv li cas?
Txiv Plig Txhiaj Foom, tus saib xyuas lub xov tooj cua Hmoob Catholic nyob Philippines teb tau tuaj piav txog kev sib txawv ntawm cov Catholic thiab lwm pab lwm pawg ntseeg. Nws hais tias, nyias yeej muaj nyias qhov zoo thiab sawv daws puav leej teev ib tug Huab Tais, tiam sis kev ntseeg sib txawv ntau kawg. Lwm pab lwm pawg mas lawv lub cim yug tsis raug kev cai, vim lawv tsis tau txais kev pom zoo los ntawm Vaj Qhia. Qhov ntawd yog vim lawv tsis ntseeg li cov Catholic hais tias: "lub cim Yug yog Huab Tais Yes Xus Pleev". Thiab lawv tsis ntseeg hais tias: "cov mov thiab cov cawv txia ua Huab Tais Yes Xus Pleev lub cev thiab cov ntshav"
- Txiv Plig Paul Fliss - Living the Catholic Faith as Hmong Catholic
Peb tej txuj ci Hmoob uas yog peb teej peb tug, peb yuav tau tsum khaw tseg. Yog peb tsis khaw peb tej txuj ci ces, tsis ntev lawm yam pem suab, heev kawg los yog 50 xyoo tej xwb ces peb tej txuj yuav ploj mus tas.
- Txiv Plig Tshaj Xwm Thoj - Xaiv txoj kev ua Ntuj hauj lwm
Txiv Plig Tshaj Xwm yog peb Hmoob, nws yog tus 3 ntawm cov Txiv Plig Hmoob nyog qab Ntuj no. Nws tau tuaj piav txog txoj kev ua Ntuj tes hauj lwm thiab qhia sawv daws txog nws lub neej thaum kawm txwj thiab npaj siab los nyob tab seeb ua Tswv Ntuj tes hauj lwm. Txiv Plig Tshaj Xwm yog ib tug tim khawv zoo tas nrho thiab nws tau tuaj qhia tau ntau yam zoo kawb rau cov tub ntxhais hluas.
- Txiv Plig Andrew Cozzens - The Eucharist - Lub Cim Yug
Txiv Plig Andrew Cozzens tuaj qhia sawv daws txog lub Cim Yug. Nws qhia txog hais tias lub cim yug tseem ceeb npaum li cas thiab yog vim li cas thaum pib Huab Tais Yes Xus thiaj li tsim muaj lub Cim Yug. Txiv Plig Andrew Cozzens yog tus thawj Xib Hwb qhia ntawv nyob rau lub chaw kawm txuj "St Paul Seminary". Nws qhia tau ntau yam zoo thiab muaj nqi kawg. Yog nej leej twg xav paub ntau ntxiv, nej hu xov tooj los yog ntau email nrog nej tu koj tham, los sis nrog Txawj Huas Hawj (Thawj koj HANCA) tham.
- Tsob Hwb Zoov Ntxheb - Kev sib hlub hauv lub cim Yug
Tsob Hwb Zoov Ntxheb Yaj hais txog kev sib hlub hauv lub cim yug. Nws piav ntau yam zoo hais txog peb Hmoob tej kev ntseeg thiab peb Hmoob Catholic txoj kev ntseeg Ntuj. Nws hais tias: "Nyob hauv peb lub neej txhua yam muaj tuaj yog peb tib neeg ti npe rau xwb. Xws li peb hais tias yam no los yam tom yog "Dab" ces yam ntawd tsheej "Dab" lawm xwb. Nco ntsoov hais tias, yog luag tej hem yus mas yus ntshai me ntsis xwb, tiam sis yog yus rov hem yus tus kheej mas ntshai dua ntais. Txhob ua neeg siab me, yus yuav txhob hem yus tus kheej.

- Choo Thoj thiab Mim Yaj - Qhia sawv daws hais txoj saw Mab Liab
Choo thiab Mim tau qhia txog kev hais txoj sau Mab Liab. Nkawv tau piav me ntsis txog kev tseem ceeb ntawm kev hais txoj saw Mab Liab thiab muaj nuj nqi npaum li cas rau peb txoj kev thov Ntuj. Choo hais tias, peb cov ntseeg Catholic, peb hawm niam Mab Liab vim nws yog peb tus Huab Tais Yes Xus leej Niam, peb tsis yog teev nws.
- Txhij Vwj Yaj - Tso duab txog Txiv Plig Nyiaj Pov
Txhij Vwj Yaj yog ib tug ntseeg uas muaj lub siab zoo thiab siab dav. Nws tau ua ntau yam zoo pab txhawb rau Txiv Plig Nyiaj Pov lub ntees. Nws tau mus koom lub ntees nyob Fab Kis teb thiab cov coj duab nws tau yees coj los rau sawv daws saib nyob rau lub Convention. Yog nej xav paub ntau tshaj qhov no nej hu xov tooj los yog sau email rau nws. Website: www.hmongrpa.org
- Hnub Chiv - Xaus lub rooj suab siab thiab ua kev zoo siab rau Txiv Plig Txhij Foom thiab Txiv Plig Tshaj Xwm.

[Saib duab \(pictures\)](#)

Lub rooj sau siab xaus rau hnub chiv nyob rau hauv lub tsev Teev Ntuj Hmoob Catholic St. Vincent de Paul nyob rau St. Paul. Cov ntseeg sawv daws cov uas tsis tau maj rov mus tsev, sawv daws kuj los sib sau teev Ntuj hnub chiv. Txiv Plig Tshaj Xwm yog tus ua lub thaj Txi Ntuj hnub chiv nrog rau Txiv Plig John Paul Erickson, Txiv Plig Txhij Foom, Txiv Plig Pov Fwm thiab ntau tus Tsob Hwb uas tuaj ntau lub xeev tuaj. Tom qab teev Ntuj tas, lub Koom Txoos St. Vincent de Paul nrog rau cov ntseeg nyob lwm qhov chaws thiab HANCA tau npaj ib pluag mov los khi Txhij Plig Txhij Foom tes ua nws tsaug rau nws tej hauj lwm uas nws tau pab lub koom haum HANCA thiab cov ntseeg Hmoob. Tsis tas li xwb sawv daws tseem ua Txiv Plig Tshaj Xwm tsaug uas nws tau lauj zias sij hawm tuaj koom sawv daws. Cov ntseeg sawv daws muaj kev zoo siab thiab ib leeg tau khi ib txoj hlua rau ob tug Txiv Plig.

Lub Convention yuav los tom ntej no yog lub caij ntuj so, xyoo 2009. Sawv daws npaj siab tuaj koom kom tau. Yuav muaj ntau yam uas coj los pab rau peb txoj kev ntseeg. Nco ntsoov saib lub website no, thiaj yuav paub txog HANCA tes hauj lwm. Yog muaj lus nug xa email rau [Txawj Huas Hawj](#) los yog [Txwj Kum Lis](#). Ua tsaug!